



Press Release:

MAKADADAEL A MINAS, SUPIATEN DAGITI UMILI TI ILOCOS BABAEN ITI ILOCOS PEOPLE'S MINING SUMMIT

Bantay, Ilocos Sur-Agarup sangagasut aginggana't dua gasut a kameng ti nadumaduma nga organisasyon ti umili, agtutubo, *non-government institution*, Local Government Units (LGU), *academe*, ken tattao ti simbaan ti agtitipon ita nga aldaw tapno supiaten ti makakadael a minas kadagiti banbantay ken kabaybayan kadagiti tallo a probinsya ti Ilocos.

Panggep ti Ilocos People's Mining Summit, maysa nga inisyatiba ti Solidarity of Peasants Against Exploitation (STOP Exploitation), Save the Abra River Movement (STARM), Katinnulong Dagiti Umili ti Amianan (KADUAMI)-Regional Development Center, Solidarity of Ilocos Associations of Women (SILAW-GABRIELA) ken Ilocos Region Ecumenical Council (IREC), a pagkaykaysaen ti kalawaaan a bilang ti umili ditoy Region 1 tapno lappedan ken supiaten dagiti gandat dagiti lokal ken ganganaet a negosyante nga agminas kadagiti banbantay ken baybay ditoy rehiyon ti Ilocos.

Segun kenni Anabel Narvasa, Convenor ti Ilocos People's Mining Summit, nabaknang dagiti probinsya ti Ilocos ti nadumaduma a mineral a kinabaknang. "Interesado la unay dagiti kapitalista kadagitoy a kinabaknang isu nga adu ti aplikasyon ti panagminas kadagiti baybay ken bantay dagiti probinsya ti Ilocos Norte, Ilocos Sur ken La Union." Kinuna ni Narvasa.

Segun iti panagsukisok dagiti Convenor ti Ilocos People's Mining Summit, adda ti nadumaduma nga aplikasyon ti minas kadagiti probinsya ti rehiyon ti Ilocos.

Addaan ti 7 nga Exploration Permit Application (EXPA) ti probinsya ti La Union, 11 met iti Ilocos Sur ken 20 iti Ilocos Norte. Sakop na daytoy nga aplikasyon ti 15 a munisipyo ti La Union, 22 a munisipyo ti Ilocos Sur ken 14 a munisipyo ti Ilocos Norte. Adda met laeng ti 3 nga Application for Mineral Production Agreement (APSA) diay probinsya ti Ilocos Sur, 13 sadiay Ilocos Norte ken 3 met laeng iti La Union. Nayon na pay, adda ti 8 nga Application for Financial Technical Assistance (AFTA) sadiay Ilocos Sur ken 4 met diay Ilocos Norte.

Naggapu ti Department of Environment and Natural Resources (DENR) Mines and Geosciences Bureau (MGB) dagitoy a datos. No gupgupen, agarup 21 a munisipyo ti Ilocos Norte, 26 a munisipyo ti Ilocos Sur ken 16 iti La Union ti maapektaran dagiti gamrud nga interes dagiti kumpanya ti minas.

Gapu iti minas, kinuna ni Narvasa, sagsagrapenen iti Kailokoan ti dakkes nga epekto ti panagminas. "Addu a talon ken pagnaedan ti napukaw gapu iti panaglayos nga epekto iti kinagamrud ken kinaagum dagiti kumpanya iti minas," impalawag ni Narvasa ken imbingay na dagiti kapadasan dagiti umili ti Bauang, La Union, Sta. Cruz, Ilocos Sur ken Paoay, Ilocos Norte a naawanan ti pangkabiagan ken pagnaedan gapu iti offshore mining.

CONVENORS



SOLIDARITY OF PEASANTS AGAINST EXPLOITATION



SILAW GABRIELA



TIMEK PAMALAKAYA



ANAKBAYAN ILOCOS

ILOCOS REGION ECUMENICAL COUNCIL





Kinuna pay ni Narvasa a bogus laeng dagiti kari ti kumpanya ti minas a trabaho ken panagduras ti biag. “Ti kinapudno na, dagiti kumpanya ti minas laeng ti agnamnam-ay gapu ti dakkel a ganansya da kakumplot dagiti ahensya ti gobyerno kas iti MGB ken ti National Commission on Indigenous Peoples (NCIP).” Innayon ni Narvasa nga impalawag nga agarup \$71 bilyon ti manamnama a maganansya ti gobyerno no mairusuat ti *black sand mining*. Sabali pay ti ganansya iti *on-shore mining*.

Babaen ti panagtignay ken panagkaykaysa dagiti umili ti rehiyon, kas iti Ilocos People’s Mining Summit, kuna ni Narvasa, maipakita a maseknan met laeng dagiti umili ti mapasasamak ti aglawlaw. “Babaen iti daytoy nga gandat, mangngeg ti timek dagiti maapektaran ken maipakaammo iti publiko ti dakkes nga epekto ti dadakkel ken makadadael a panagminas ti aglawlaw, pangkabiagan ken pagtaengan dagiti komunidad ti rehiyon,” kinuna ni Narvasa ken impasingked na a daytoy ket rugi ti adu pay a panagtignay tapno suppiaten ti makadadael a panagminas.

Idi napan a lawas, naisayangkat iti Benguet, Abra, Mountain Province, Ilocos Sur (BAMPIS) Mining Summit a dinar-ayan ti agarup 200 a maseknan ken *advocates*. Maysa ni Santa Mayor Jeremy Jesus Bueno III kadagiti dimmar-ay ken nakipagpaset kas Keynote Speaker ken boluntaryo a nagbalin a *Convenor* ti nabukel nga alyansa a BAMPIS Mining Summit. Inyebkas na met laeng ni Mayor Bueno ti panangkontra na iti panagminas nangruna kadagiti baybay ken bantay ti Ilocos.

Idi met napan a bulan, naitakder ti People’s Solidarity Against Large Scale and Destructive Mining in Ilocos Norte (PSALM-IN) a bukuklen dagiti kameng ti tattao ti simbaan diay Ilocos Norte a mangsusupiat ti makadadael a minas diay Ilocos Norte. Nangisayangket met ti Ilocos Sur Ecumenical Movement (ISEM) ti serye ti innadal maipanggep ti *Offshore mining*. Babaen met laeng ti inisyatiba ni Mayor Bueno, naisayangkat met ti SOS wenna Save Our Santa idi Oktubre kas pananglapped kadagiti aplikasyon ti minas diay Santa.

Ti tema ti nasao a summit ket, “Bambantay ken Baybay, Salakniban! Agkaykaysa a Suppiaten ti Dadakkel ken Makadadael a Panagminas!”

Naimbitaran kas Keynote Speaker ti Ilocos People’s Mining Summit ni Mr. Windel Bolinget, pangulo ti Cordillera People’s Alliance (CPA) nga addaan ti attidog a kapadasan ti panangsupiat ti makadadael a minas diay Cordillera. Mangibingay met ti testimonya dagiti residente a naapektaran ti panagminas. Manamnama a mabukel ti maysa a nalawa nga alyansa kontra iti dadakkel ken makadadael a minas ditoy rehiyon kalpasan ti Summit.

Maysa met a martsa-rally ti maisayangkat iti ala-una ti malem tapno maiyebkas dagiti umili ti panangkontra iti makadadael a panagminas. #

Para iti nayon nga impormasyon, mabalin nga i-kontak da:

Rev. Fr. Noel Dacuycuy ken Anabel Narvasa

Babaen ti Ilocos People’s Mining Summit Media Team 0908-867-8196 ken 077-722-7933 wenna iocosmining.media@gmail.com



SOLIDARITY OF
PEASANTS
AGAINST
EXPLOITATION



SILAW
GABRIELA



TIMEK
PAMALAKAYA

CONVENORS



ANAKBAYAN
ILOCOS

ILOCOS REGION
ECUMENICAL
COUNCIL

